



明詩正聲卷五十七 七言絕句六

廣陵

盧純學

選輯

江一夔校閱

寄京華舊遊

蹇達

青雲久斷故人書得意何須薦子虛自識主恩  
憐病骨茂陵還許卧相如

過歸德留寄吳明卿

日下孤城柳亂飛斷烟平楚暮霏微可憐遷客  
迷芳草落盡桃花無路歸



平蠻凱歌

朱孟震

帝遣元臣西破戎，千山風雨百靈從。  
前茅一指攬搶滅，人道營中有卧龍。

寄費民益因懷青溪舊社

桃葉渡頭花亂明，青溪浦口暮雲生。  
當年邀遂行遊處，只有寒潮挾雨聲。

白牡丹

梁辰魚

春風和淚泣鮫鮓，三月枝頭雪未銷。  
徙倚闌干謾惆悵，沉香亭北已蕭條。

金陵元夕

歐大任

舊京門巷盛繁華，雙鳳銜燈出帝家。  
寶馬嘶殘三市月，玉笙吹過五陵花。

同沈道士登東麓亭望謝公墩

冶城北望盡烟霞，猶有荒墩屬謝家。  
五十出山君莫謂，中原談笑淨胡沙。

雨後同姚元白楊惟五城南諸寺

萬疊青山遶帝城，城南竹杖喜春晴。  
遊人多問華林苑，誰解長干寺裡行。

登寶蓮閣

水遶花宮隔世塵十年登閣悟前因  
白蓮影現池中水半是匡山社裡人

送何長卿往江西

南來名士說何顥篆學秦斯隸漢邕一舸圖書  
前路去大江秋色照芙蓉

吳駕部齋中聽李生歌

二十年来李節箏吳郎今有隴西生  
隴山鸚鵡隴頭水散作歌喉窈窕聲

秋夜

江南江北露華深黃葉丹楓寄遠心  
一夜歸人頭欲白故園猶隔萬家砧

香山寺

郭第

碧雲回首翠千重又聽香山寺裏鍾  
乳鵲不飛人寂寂女蘿垂葉掛長松

平坡寺黎禪師對雨

雙樹林中寶月光木魚聲裡對空王  
山僧寂寂經行處清磬猶傳午夜香

徐飛卿舟至焦山

棹歌聲香水雲重  
畫裏還同曲裏逢  
一片雨花臺上月  
相隨泛影出夫容

飛卿過雲烟閣臨帖

青蓮梯轉拂香塵  
背嶺天風馭洛神  
竹裏北窓新浴硯  
帖中臨出衛夫人

田居

盧純忠

溪上茆堂一鑑開  
四封素柘一叢栽  
斜陽不斷漁郎路  
何處扁舟曬網來

山莊憶二仲

一水相望隔暮城  
西堂遙夜夢難成  
山村何處雞聲曉  
風雨池塘草自生

送胡生南歸

陳宗虞

楊子江風落暮潮  
瓜州夜月起蘭橈  
西湖歸去三千里  
家在芙蓉第一橋

暮春

江珍

玉河橋畔柳垂絲  
片片飛花匝御池  
惆悵故園桃李樹  
春風開遍幾多枝

遼城寄憶

俞憲

胡天一望盡高秋，忽傷中原憶舊遊。  
漢省春風吹視草，庾家明月照登樓。

遼城望月

片月盈盈海外生，遙應九塞一時明。  
望京樓上頻回首，何處清光五鳳城。

早行

逯希韓

晨鷄喔喔遠村啼，林暗山昏路欲迷。  
羸馬衝風歸思急，不堪回首月明西。

送二山宋太府之霸州兵憲 蘇潢

建牙推轂重才名，六月霜威向北平。  
防虜不須高築塞，使君此去是長城。

即事

李同芳

晨起梳頭忽絕倒，滿把青絲變秋草。  
三尺龍泉躍壁間，壯懷未吐人空老。

立秋

龔勗

煙雲黯淡仲宣樓，荏苒年華逝水流。  
白首鄉山千里外，滿城風雨又新秋。

楊新二公園

吳擴

相國名園夾道開，綠楊深鎖舊樓臺。  
多情最是呢喃燕，不厭空梁歲歲來。

上谷初夏見桃花

塞北風寒物候遲，客心迢遞阻歸期。  
山城入夏桃花發，却訝江南二月時。

趙太史

曾向君前歌竹枝，偶然傾蓋即相知。  
長安醉後輕離別，十載天涯兩鬢絲。

宿龍池寺聽溶上人誦經

陳純

白雲千頃寺門深，慧遠遺蹤尚可尋。  
竹裡經聲聽不盡，一池明月浸禪心。

登黃鶴樓

沈仕

黃鶴樓前望故鄉，南來十月始新霜。  
長風吹徹無征鴈，唯見青天入漢陽。

出宛陵

凌歊臺下泛潺湲，棹入澄江二月還。  
兩岸桃花如送客，不堪回首敬亭山。

春行

林雲程

柳葉初齊棗葉稀天涯遊子此時歸青驪嘶斷  
春風起山雉相將挾子飛

送約卿之姑孰

張九一

八月揚帆下石頭瀟湘遷客遂淹留長江左抱  
丹陽轉一水能牽兩地愁

疑塚

黃德水

英雄事去藐難徵疑塚纍纍半已崩試問當時  
銅雀妓定將若箇當西陵

噴玉泉

飛崖削壁泉從空中懸下數十丈

飛泉一道挂雲端手援松枝下馬看噴玉跳珠  
渾不似十尋冰柱落空寒

飛雲洞

仙梯窈窕接禪扉石乳啞鈇結翠微雲卷前峯  
天籟靜隔巖風雨瀑泉飛

春深

姚泚

春城柳色暗香堤曲徑花深過客迷林靜日長  
無一事畫橋來往聽鶯啼



其二

青溪烟水坐良宵  
門掩梧桐月滿橋  
空外誰家起清韻  
古藤花下聽吹簫

潯陽夜泊

姚汝循

夜泊潯陽月滿船  
蕭蕭蘆荻冷秋烟  
孤臣此日青衫淚  
不待琵琶已泫然

舟中與金應祥年兄言別

風生古岬冷蕙葭  
半幅輕帆挂落霞  
江水秋來渺無際  
不知何路向長沙

送葉茂長

江一鵬

日下寒山去路遲  
故人今夜定依誰  
野橋村店相思處  
正是空江落月時

贈蘇子文

淮海知名舊有名  
翻成詞譜按新聲  
風塵十載空彈鋏  
消盡黃金白髮生

贈張麗人

說盡相思淚未收  
舍人何以贈纏頭  
十年不聽霓裳曲  
今夜魂消燕子樓

寄王元美

顧聖之

聞說三山海上頭，釣鼇誰共使君遊。  
春來擬到蓬萊閣，遍看仙人十二樓。

再送童山人南歸

康從理

長安君去我還留，一夜西風暗白頭。  
斜月亂雲江海暮，乾坤何處不堪愁。

姑蘇道中

張以文

為誰移棹入江南，依舊携愁水上還。  
竟日浪花看不厭，令人輕別虎丘山。

送宗姪伯玉庫部還歙

汪一中

薊門秋色接邊塵，聖主方勞頗牧臣。  
爾向東山若留滯，謝家勲業屬何人。

白苧詞

金鸞

美人終夜理吳機，白雪新裁作舞衣。  
莫把君恩倚團扇，西風容易入羅幃。

泊天津

月明天際酒初醒，直北雲深海氣涵。  
一夜潮聲來枕上，夢中猶似在江南。

古寺訪僧不遇

包大中

野寺春陰布穀啼  
洞門閒倚白雲低  
遠公卓錫今何許  
誰伴淵明過虎溪

吉囊蹂躪山西歌

王嘉言

偏頭寧武鴈門關  
萬壑千崖道路難  
黠虜平穿市井過  
瘡痍七月報長安

其二

鼙鼓喧闐驕子來  
一軍不見鴈門開  
晉陽滿地愁兵燹  
悍將催僧下五臺

其三

四婦腰鑣殺小胡  
代州城下獻頭顱  
將軍空佩黃金印  
十萬橫行一箇無

楊柳青懷舍弟

青青楊柳映薰葭  
兩弟如今正在家  
芳草王孫歸未得  
滿庭開遍紫荊花

春怨

曹道

朝元鍾罷正黃昏  
繡竹羅衣拭淚痕  
燕子雙棲春欲暮  
一庭花雨闥重門

壬戌下第宿張家灣

桑紹良

貂裘敝盡客還家  
郭隗臺前日欲斜  
回首鳳城春色好  
鶯聲啼碎碧桃花

送李徐二師方舟北上

汪時元

兩岸垂楊綰別愁  
長風曉發過揚州  
只看雲裏雙帆影  
不盡黃河天漢流

其二

廣陵濤起白雲寒  
北望燕臺路渺漫  
李郭翛然明月下  
滿舡秋色到長安

山水圖為陳雨江題

金鎰

山中高士芟荷裳  
獨向顛崖結草堂  
歲月往來渾不記  
松根芝草一人長

閨詠

銀盆水冷鉛華澁  
井幹香心露紅濕  
越羅衫薄不勝寒  
小院梨花晚風急

其二

銀塘藕花香漠漠  
稚笋作竿槐覆屋  
啾啾赤帝鞭火龍  
團扇無風香汗落

其三

錦樹帶霜寒惻惻  
牙牀捲却龍鬚席  
離鸞一曲紫簫空  
水冷銀河怨秋夕

其四

瓊花碎舞上簾幙  
香冷鴛鴦繡衾薄  
水咽銅龍夢不成  
良人早晚歸沙漠

山水圖

夕陽收盡寒烟滅  
萬里空江帶秋月  
短舟何處獨歸來  
西風滿地蘆花雪

咏潘邠鄆韓妓

張簡

怕聽邠鄆陌上歌  
千金不惜購韓娥  
潘安自是風流客  
此日叢臺興轉多

秋樹下送張雲少憲使

潘子震

老樹臨風葉半黃  
一樽岐路又斜陽  
別君何必折楊柳  
只此秋聲已斷腸

龕山凱歌

徐渭

短劍長鎗暮合圍  
寒風吹血着人飛  
朝來道上  
看歸騎一片紅冰冷  
鐵衣

臨清謠

錢楷

觀音閣下水茫茫夏守祠前月似霜何處少年  
歌白苧一時秋露滿衣裳

其二

清源過雨晚來晴市上吳儂躡屐行一行綠柳  
隨烟盡兩岸新粧照水明

其三

小袖長衫杏子紗兩河岸上盡娼家日暮板扉  
臨水閉樓頭娛客撥琵琶

早秋聞鴈

一夜西風枕簟涼滿天征鴈向衡陽深宮猶自  
揮紈扇六月邊城已下霜

江上風雨憶與士隆兄別

葛幼玄

積雨寒陰起白楊天涯兄弟各沾裳隔江秋色  
難回首淮水西風鴈一行

為徐娃題扇兼別郭次父

嬌歌不盡暮天愁何處佳人獨倚樓一自彩雲  
次散後孤城明月為誰留

其二

歌殘那得暫淹留  
千里相思月一鉤  
後夜離心  
瑤瑟裡白雲芳草不勝愁

句曲道中望鍾山

王氣晴陰滿夕陽  
千峰秋色半蒼茫  
淮南未必  
能招隱  
願乞鍾山舊草堂

竹西亭逢家兄

滿篷風雨客思家  
愁絕鶯啼幾樹花  
薄暮張燈  
照顏色不知今夕在天涯

十月六日暘谷李山人甫東草堂留別得

寒字

盧叔麟

江城十月鴈驚寒  
短髮偏嗟行路難  
莫惜銜杯  
今夕醉明朝長缺向誰彈

送王九溪南歸

沈霑

三月都亭草尚嬌  
王孫重度薊門橋  
遙遙馬首  
東西路剩得離情在柳條

吳山人約過湖上以事不果  
張邦仁

十里澄湖漾碧空  
薰葭水冷夜來風  
山人愛向

磯頭坐目送孤雲落鏡中

塞下曲

隴水西頭月正圓邊烽不動夜安然無端蘆管  
中宵起化作秋聲滿碧天

塞下寄幕府張嵒峽

穆文熙

黃沙千里暮雲平刁斗轅門夜不驚一笑胡奴  
歸掌握嫖姚不數漢時名

其二

少小胡姬學漢裝滿身貂錦壓明璫金鞭嬌踏  
桃花馬共逐單于入市場

絕句

解印歸來歲幾經角巾常傍少微星山中宰相  
無塵事鳳沼年年草自青

結襪子

李元昭

世態人情薄如紙平原倏忽風波起那知筵上  
絕纓客匹馬橫戈為君死

冬夜獨坐

鄭洛

天涯歲暮夜淒淒鼓角初傳月已低一榻悠然



成獨坐不知身寄玉關西

秋暮期甕直軒過陽和却寄

楓葉翩翩丹樹枝懷人恰是鴈南時尊中我有  
平原酒客裏誰憐塞北思

寄丘太守

魏允貞

一派長江勝剡溪荆門東下接黃陂秋來明月  
堪乘興何必山陰憶戴逵

遊桃源洞

宋登春

漁郎何處問迷津流水桃花小洞春當日避秦  
人不見青山曾見避秦人

見桃花懷諸同社

張文介

偶然為客忽經春驚見桃花滿眼新遙憶西湖  
同社侶看花應念未歸人

少保方公款胡凱歌

李言恭

燕支山下戟如麻古戍寒風擁白沙何意兩軍  
相見處胡姬行酒醉琵琶

其二

初連山下百花明虎帳穹廬夜不驚堪訝古來

爭戰地漢家今作受降城

送何仁仲鴻臚還楚二首

美人天上罷含香無數離愁酒一觴不為湘娥  
能解佩因君魂夢到高唐

尊前寒色滿吳鈎相對西風解敝裘明日蘆花  
湘水濶天涯何處問孤舟

寒夜曲

顧大典

簾外西風碧草荒隴雲飛盡夜蒼蒼額持紅粉  
樓中月一照黃龍塞上霜

九月十七夜與周國雍話舊

霜滿薰葭月滿池斷烟疎樹影參差天涯莫道

相逢易昨歲今宵是別離

予與國雍越中言別正去年今日也

金陵楊柳詞

太液池頭欲暮春誰家玉笛按歌新長堤風起  
花如雪愁殺高樓獨倚人

讀秋水篇

文彭

楊柳生風拂釣船晴雲倒影浸青天白鷗飛盡  
寒烟滅讀到南華秋水篇

明詩正聲卷五十八 七言絕句七

廣陵

盧純學

編輯

江一夔

校閱

傷離四首

沈懋學

獨倚朱絃夜色深  
孤舟斜月對霜林  
青天無語長河沒  
惟有江流識此心

其二

月墮空江白露秋  
遙看仙珮碧雲流  
青山片片浮瀛海  
何處逢君話別愁

其三

仙路迢遙擁翠幢  
雲霞空負彩鸞雙  
瓊簫聲斷愁無賴  
殘月依依半入窓

其四

香案曾同侍玉皇  
人間何事苦參商  
乍逢忽隔仙源路  
無柰離愁秋夜長

寄沈嘉則客海陵

余寅

木脫霜高野戍明  
天涯白日坐憑陵  
江南杜宇無情甚  
啼遍長河一片冰

其二

海陵原是舊揚州  
海水何曾向北流  
若說邗溝當日事  
幾人親見渡龍舟

其三

後夜長虹下燭溪  
寒江不動萬峰低  
楚天只在丹楓外  
一望愁隨片雨迷

秣陵道中

丁應泰

郭外禪林古道通  
山山秋色淨長空  
孤鴻天外聲將斷  
落盡寒霜幾樹楓

過衛有懷

衛國樓臺衛水頭  
千山南去一孤舟  
故鄉遙在湘江上  
黃鶴樓前江水流

張山人少學寄居霸峰寺五十年所矣營  
翠微閣其中為菟裘老焉老而見逐寺  
僧靡所託止遂僦居孤山祠下作避虎  
行出以示余憐而為作三絕句廣之

徐桂

垂老蕭然別故廬  
貌君丘壑竟何如  
誰言招隱淮南賦  
今日翻成逐客書

其二

少小誅茆老閉關  
若為黃髮去商顏  
人生到處蘧廬耳  
聞道巢由不買山

其三

何用貪他布地金  
乾坤無處不雲林  
試看猛虎行中語  
志士寧依惡木陰

雨中賞夜合花

余翔

風動香飄十二闌  
雨中相對一樽殘  
玉容莫向

黃昏歛正欲携燈醉後看

春園即事

睡起西齋日欲斜  
溪邊汲水自烹茶  
捲簾坐見雙飛燕  
衝落櫻桃幾片花

其二

東風吹雨到江村落  
盡梨花晝掩門  
柳外鶯聲春自轉  
一庭芳艸暗銷魂

寄沈純甫

曾仕鑑

鴈斷長天一字無  
夢懸明月萬山孤  
誰憐興盡

迴舟夜搖落西風病未蘇

朝雲塚

青山湖上掩黃昏  
千載誰招越女魂  
惟有六如亭下草  
春來無語怨王孫

宮詞

王叔承

閩州荔子玉玲瓏  
五月西來萬里紅  
笑取一枝連理顆  
繡綈封入合歡宮

西湖歌

亂山青擁趙王城  
一片西湖十里明  
三月烟花

江國暮錦雲斜日櫂歌聲

雪後衝冰出太湖口占

亂山飛白送征帆湖上乾坤玉半含怪底塞鴻  
驚不定冰花千里失江南

與胡原荆陳濟之梁溪東樓看月適王元

方携酒到則李茂卿舟泊樓下矣喜述  
月翻波影亂溪樓得酒凭闌數白鷗怪底一燈  
寒照岸天風吹落故人舟

飲梅花下

萬家梅樹雪千村林白嵐香雨不昏恍見玉人  
林屋洞羅浮新月送冰魂

病對梅花寄懷卓漱父因訊雲山軟袖

病倚梅花幾憶君春寒猶自隔鷗羣故人曾許  
雲山衲為剪東林一片雲

西湖竹枝詞

南朝古寺太風流半近妝樓半酒樓孔雀經前  
齋姊妹鄰家紅袖襯錢留

其二

斷橋拋骨水為墳風弄紙錢吹白裙幾段哭聲  
情緒亂斷腸元不為夫君

其三

船頭船尾兩峰高天教綠柳間紅桃柳條爭穿  
活魚賣新漲桃花水半篙

風雨渡湘江

一天風雨渡三湘九月長沙憶故鄉可有家書  
問遊子幾行新鴈到衡陽

北征雜歌送別陳寧鄉入覲

猶見羊公漢水湄峴山明月草離離送君不盡  
丁寧語勒馬重看墮淚碑

風雨過鄱陽湖口望大孤廬山

亂山為縣鎖長江江口湖開萬頃蒼湖上孤峰  
鏡中黛楚風吹雨一船涼

其二

小孤纔過大孤來婀娜雙鬟相對開况復廬峰  
千嶂出九天飛瀑灑寒杯

月夜過洞庭



蜀江西帶九江流水上孤城一點浮玉笛數聲  
仙客過白雲飛墮岳陽樓

晚泊毘陵朱君携酒過集舟中作

陸弼

孤城春水浸桃花白髮逢君酒重賒一曲清歌  
滿船月不知今夜是天涯

留別凌顧二生

徙倚高樓出萬峰白雲玄草日相從風塵空有  
張華劍未到延津不是龍

逢南豐周丞有贈

章嘉禎

白日西風盱水流逢君一夕破千愁扁舟歸臥  
臨溪上明月相思海樹秋

月下過中壩

王穉登

月裏輕舟上急灘空中瀑布捲簾看無風自覺  
衣裳薄始信瞿塘六月寒

湖上桃花歌

山烟山雨白氤氳梅蕊梅花濕不分渾似高樓  
吹笛罷半隨流水半為雲

曹娥廟

漠漠秋潮浸古祠  
蕭條黃絹已無碑  
只今秦望寒山色  
還似曹江孝女眉

長安春雪歌

一半秦聲半楚聲  
秦娥調瑟楚娥箏  
鳳凰城裏家家雪  
但是紅樓凍不成

織錦詞寄侍兒

燈前織錦雨吹窓  
忽憶行人未渡江  
織出鴛鴦才一半  
待郎歸日始成雙

送余君房下第還四明

黃金臺畔送君行  
易水悲風滿座生  
我亦東歸無不可  
要離墓下有田畊

其二

千樹啼鶯花自紅  
江東歸客怨春風  
馬頭蟬螻光如雪  
知是干將在匣中

無碍寺訪授經慧上人

書聲一半是多羅  
試問靈花夜若何  
藜火慧燈光竝朗  
可能分照病維摩

西湖

屠隆

大隄楊柳映紅霞萬井樓臺千樹花  
費盡黃金買歌笑画船强半載琵琶

趙姬墓

有引

杭州名伎也嫁蔡生生死姬亦死家人  
分兩塚相去里許姬不能從余過其墓  
傷之為賦絕句

泥消香粉襪生塵燕子樓空不見春  
一片傷心秋草綠墓門斜日照行人

其二

東風幾度墓花開荒徑無人滿碧苔  
地下相思應不死黃壚那得望夫臺

其三

當年死不共埋香零落鈿釵草樹荒  
欲化韓憑空悵望一心無地託鴛鴦

渡黃河

野曠天陰日欲西北風吹雪鴈行低  
黃河渡口行人少一片寒沙沒馬蹄

塞下曲

狂隨都護出行邊  
斬得胡頭馬上懸  
萬里無人沙月白  
霜前獨枕大刀眠

春日獨當壚

二八胡姬白似霜  
春風小雨石楠香  
壚頭玉腕金跳脫  
醉殺揚鞭馬上郎

秦淮

胡旦

秋風雁度月明沙  
隔岸漁翁喚酒家  
醉聽吳歛傷往事  
六朝流水落蘆花

出塞詩

胡旦

曉拂旌旗向虜庭  
黃沙陣陣攪疎星  
路傍唯見明妃塚  
略似中原艸色青

其二

陰山飛雪正稜稜  
旗引天兵陟萬層  
裂血迎風飄墮地  
紮騮蹄下濺紅冰

閨怨

梅鼎祚

遠書初寄塞鴻聞  
百戰猶隨霍冠軍  
不信寸腸曾萬轉  
請看錦字織迴文

寄朱秉器按察大梁因薦吳汝州廷承記

水令子登

虛左當年意氣真信陵千載尚如新抱關小吏  
勞君問亦有夷門任俠人

保豐臺秋望

寒江湛湛日流東一鴈西飛下碧空獨向保豐  
臺上望斷腸秋色在丹楓

春辭

別後冰絃不忍彈小樓花雨怯春寒歸鴻目斷

香雲碧愁倚東風十二闌

太微樓夜聽松風

長松虛閣頰蒼烟萬頃濤聲一枕縣片片龍鱗  
吹欲立忽驅寒雨徧諸天

聞山東楊將軍物故

大樹蕭蕭起大風將星初落海門東獨留雙劍  
猶含血夜夜牀頭吐白虹

古怨

明月長懸玉鏡臺丁香花下待郎來當時贈得

同心結縵有春風剪不開

題所佩劍

寒光片片吐龍鱗尺鉄何曾暫離身莫逐延津  
風雨化明朝還作報恩人

別家

張邦伊

病骨年來畏遠遊無端又動別離愁官奴城下  
西江水朝夕催人易白頭

宿丹陽縣

張邦侗

春風桃李度丹陽今日重來柳半蒼薄暮一尊

愁自語滿城砧杵是他鄉

贈周郎讀書蕭寺

塔影幢幢古佛堂半月明月落銀牀讀殘鄴架  
三千軸坐看吳鉤起白霜

維揚夜蒞

車大任

風帆夜汎廣陵舟雲水空濛帶月流况復玉簫  
聲不斷可無斗酒破羈愁

出都門馬上口占

樽酒空逢燕市醉毡裘又向楚雲歸十年車馬

長安道猶自蕭然一布衣

其二

楚水燕關道路難留春不住又春殘白雲縹緲  
蒼山外惆悵斜陽立馬看

與臨清武雙溪

十載相逢章水濱與君同醉異鄉春誰知今日  
清源道又向天涯識故人

蔡寨主李鳳江宅和楚中丁元父諸公韻

一首

馬首西風吹客冠腰間劍氣斗牛寒主人索我  
新詩贈欲和陽春亦自難

寄贈陳憲卿

吳敏道

粉署霜臺已倦遊歸來杜若滿汀洲倚天高閣  
夫容帳六月江風萬頃秋

其二

泗曲村庄綠水圍丈人已息漢陰機楚天空闊  
江樓迴閒看鷓鴣接羽飛

其三

燕寢清香暮雨收丹霞錯落海東頭聚星樓上  
長生酒更羨風流老太丘

登上方禪智寺

王延祚

一逕逶迤半薜蘿寺門流水落花多春風吹送  
東林鳥飛上垂楊向客歌

山中雨夜簡鍾給事

陸應陽

漂零王粲尚依劉搖落江門白鴈秋日暮客愁  
銷未得一天風雨獨登樓

江上懷史比部

建業城西秋可憐蕭疎黃葉白雲天舊時玄武  
湖邊月不是懷人亦黯然

鄭州旅次用壁間陸君策韻

朔風吹落九河陰處處寒衣急暮砧一望薊門  
黃葉滿始知秋向客中深

古城

龍戰何年折寶刀秋風立馬問前朝濤聲日夜  
蛟龍泣莫是吞吳恨不消

送倪別駕謫尉晉陽



霜落芙蓉劍氣寒孤臣萬里度桑乾多才自昔  
還多忌莫向人歌行路難

其二

黃河堤畔柳條新君去平陽已暮春共道 聖  
朝多雨露肯令遷客老風塵

失題

成淳

女郎隄畔赤闌橋十二樓臺鎖寂寥楊柳不知  
歌舞散春風猶學小蠻腰

其二

誰家池館秘青霞知是平章公子家一自美人  
棄鶴去海棠零落不生花

陽花聞歌得雲字

朱正初

春星高燭夜氤氳一片歌聲度錦雲惆悵倚闌  
人不見名花空妬石榴裙

春夜逢顧氏二歌者將之廣陵醉後慨然  
有作

青燈細雨黯消魂翠袖淋漓酒一尊回首梁谿  
兩行淚可堪重說舊人恩

送陳文學謁蒲州公

東風正馬柳條新  
才子遊燕貴入秦  
賦就不須楊意薦  
只今開閣有平津

寄酬鄆郡劉賈叔見訪不值

一片春流過雨寒  
青山如黛隔江看  
不知題鳳人何處  
惆悵回車憶呂安

宿智果寺

濮陽傳

智果寺前秋夜闌  
泠然白露下闌干  
林邊百頃查湖水  
碧浸一天星月寒

送俞文學入楚

陳永年

青山兩岸夏雲新  
蓬底江聲送遠人  
若到習家池上過  
銅鞮歌曲已成塵

江上

范如珪

江上西風雨復晴  
菰蒲深處釣絲輕  
何人隔岸吹長笛  
楊柳秋江一夜生

大雲山送朗上人歸石門

汪以湘

卓錫西林夜未歸  
冷雲相逐滿緇衣  
明朝還向元來路  
雪霽千山一鳥飛

窮居感懷

唐汝龍

少年結客五陵遊，散盡黃金散盡裘。  
今日惟餘空劍在，寒光夜夜照人愁。

留別繆以道

葉之芳

隋堤楊柳夾官程，君挽長條贈我行。  
留取還家種門口，令人常記別時情。

淮上懷古

楚天寥廓白雲閒，千載淮王去不還。  
惟有桂枝猶自綠，無人招隱八公山。

遊狼五山

白鳥滄波盡日閒，孤雲飛去不知還。  
中流石壁開雙峽，疑是巴江兩岸山。

送王承父遊楚

楚城到日及春殘，千里鶯花醉鶡冠。  
聞道武昌魚不貴，客中長缺莫輕彈。

贈避難者

草綠江南風雨頻，敝裘山寺度殘春。  
誰憐長聽烏啼客，却是吹簫吳市人。

懷狄侍御

鄧伯羔

湖邊春草沒魚梁三徑蕭然舊業荒  
瀨水白雲書斷絕夢魂偏逐雨聲長

遊武夷歸先寄王說之諸子

天涯白恰盡年華一片鄉心萬里槎  
生事何嫌歸去拙贈君囊有幔亭霞

武夷歸寄豫章劉維芳

歲晚江南落木深石池風雪鴈聲沉  
携來天柱峰頭月照見番君萬里心

江上望西山有懷孟文學習孔劉孝廉學

周

吳士良

西山遠在故人里故人居隔寒谿水  
片雲可望不可招羣峰隱隱飛欲起

宮詞

邵正已

月轉梧桐夜漸闌長門窳莫不勝寒  
臨風欲奏相思曲抱得箜篌不忍彈

宿鄞江舟中

楊承鯤

露白江清水木齊石嵐沙月古城西  
天寒山路

行人絕秋葉陰陰絡緯啼

江樓

酒幔風帘十萬家門前流水是桃花吳鹽似雪  
來供饌越女如雲去浣沙

郡樓屬眺偶作

樓船消息近如何門外年年羽檄過縱有強兵  
耐苦戰東南民力已無多

贈陳使君思進

南陽太守出行春袒幘相迎坐嘯頻袖裏吳鉤

如雪色不知誰是報恩人

春日泛爽亭成

柳外荒城背日斜竹西茅屋是漁家南山雨歇  
春流至多少游魚上淺沙

宿舟中

清江一宿莽雲松月曉寒鐘出萬峯卷幔酒醒  
霜露入水風吹落白芙蓉

月落

月落未落天夜明水流不流江鏡平沙棠美人

金鑑

隔秋浦一曲菱歌無限情

詩正聲卷五十八



